

# Prea na tok bilong God i groim sios.

---

Moning.

Ol planti manmeri ol i tingim olsem, ol misineri, em ol man i gat wok bilong prea na autim tok bilong feifful wok bilong Jisas, ol i no ken i bisi tumas long dispela wok bilong ol na ol i mas bisi long tilim helpim long ol manmeri bilong ples. Ol i tingim olsem, ol misineri ol i mas *slekim* wok bilong ol long prea na long autim tok bilong feifful wok bilong Jisas na ol i mas wok *moa* long tilim ol kainkain helpim, tilim ol kainkain kago, long ol manmeri bilong ples.

Tasol dispela i no gutpela na i no rot bilong God. Lukim **Aposel 6:1-7**....

**<sup>1</sup>Na long dispela taim, taim namba bilong ol disaipel i kamap planti moa, ol disaipel Juda i tokples Grik ol i komplem long ol disaipel Juda i tokples Hibu. Long wanem, long olgeta de, taim ol i skelim ol samting long ol manmeri i sot, ol i abrusim ol wido meri bilong ol tokples Grik. <sup>2</sup>Orait, ol 12-pela aposel ol i singautim olgeta disaipel i kam na ol i tok, "I no gutpela long mipela i lusim wok bilong autim tok bilong God na mipela mekim wok bilong tilim kaikai. <sup>3</sup>Em olsem na, ol brata, yupela makim 7-pela man long namel long yupela. Em ol i mas i stap gutpela man long ai bilong yupela olgeta, na ol i mas i pulap long Holi Spirit na yusim save bilong ol long gutpela wei. Na mipela bai setim ol bilong mekim dispela wok. <sup>4</sup>Tasol mipela yet bai pas olgeta long prea na long mekim wok bilong tok bilong God." <sup>5</sup>Na ol disaipel ol i harim dispela tok na olgeta i amamas. Na ol i makim Stiven, em i man i pulap long bilip na long Holi Spirit. Na ol i makim Filip na Prokorus na Nikanor na Timon na Parmenas na Nikolas. Nikolas em i man bilong taun Antiok, tasol em i tanim na i pas wantaim ol Juda. <sup>6</sup>Ol i sanapim ol dispela man long ai bilong ol aposel, na ol aposel i beten na putim han antap long ol.**

**<sup>7</sup>Na tok bilong God i ran i go. Na namba bilong ol disaipel i kamap bikpela moa yet long Jerusalem. Na planti bilong ol pris ol i bihainim dispela bilip tu.**

Wok bilong prea na autim tok bilong feifful wok bilong Jisas em i nambawan.

Ol aposel i tok olsem "*I no gutpela long mipela i lusim wok bilong autim tok bilong God na mipela mekim wok bilong tilim kaikai*" (**lain 2**). Ating ol wido meri bilong tokples Grik ol i tok strong long ol aposel, bai ol aposel yet i stretim hevi bilong ol. Yu save, ol i laik ol aposel i *slekim* wok bilong ol long prea na long autim tok bilong God na ol i mekim wok bilong skelim na tilim kaikai long ol wido meri i nidim helpim.

Na ol aposel ol i no minim olsem, wok bilong helpim ol wido meri em i no gutpela samting. Nogat. Ol i minim tasol, i no gutpela long *ol aposel yet* i lusim wok bilong ol long prea na long autim tok bilong God bilong mekim wok bilong helpim ol wido meri long kaikai (**lain 4**).

Wok bilong givim helpim long manmeri i nidim ol sampela helpim em i gutpela wok, tasol i no gutpela long lusim wok bilong prea na autim tok bilong feifful wok bilong Jisas *bilong* mekim wok bilong givim ol helpim. Man God i makim bilong mekim wok bilong prea na autim tok bilong God, orait ol i mas i stap long dispela wok God i givim ol. Ol i mas wok strong bilong mekim *feifful wok bilong Jisas* i kamap ples klia na ol manmeri ol i ken i save olsem, feifful wok bilong Jisas em i rot God i makim bilong kisim bek sinmanmeri. Long rot bilong prea na long rot bilong autim tok bilong feifful wok bilong Jisas, ol manmeri bilong God ol i ken i bilipim na trastim Jisas, na ol i ken i tanim bel na bihainim Jisas na kam insait long femili bilong God, na ol i ken i senis na kisim tingting na pasin bilong Jisas.

## Wok bilong autim tok bilong feiftul wok bilong Jisas i tekim taim.

Planti manmeri i tingim olsem, ol misineri na ol pasta ol i ken i autim tok bilong God na *wantaim* ol i ken i mekim wok bilong givim helpim long ol manmeri. Yu save, ol i tingim olsem, wok bilong autim tok bilong God em i no bikpela samting na i no hatwok tumas. Na ol i tingim olsem, wok bilong *redim* tok bilong autim em i no hatwok. Ol sampela pasta ol i no save stadi na redim tok. Nogat. Ol i sanap na autim nating tasol!

*Ol brata na sista*, yumi mas save olsem, taim man i laik autim tok, orait em i mas prea i go i go na askim God long givim save long em long as na minim bilong tok bilong God. Na em i mas ritim tok bilong God i go i go, na Em i mas stadim tok bilong God i go i go, na em i mas skelim na tingting i go i go inap long tok bilong God i kamap ples klia long em, inap long God i givim save long em. Na em i mas tingting long hau em i ken i autim dispela tok bilong helpim ol manmeri klia olgeta long tok bilong God. Lukim **Ol Provep 2:3-5**...

**<sup>3</sup>tru tumas, sapos yu *singaut long kisim save long ol tok i dip tumas,*  
na sapos yu *bikmaus bilong kisim save;***

**<sup>4</sup>na sapos yu *wok hat long painim, olsem ol man i wok hat long painim silva na ol i wok hat long painim gol i hait long graun,***

**<sup>5</sup>orait, bai yu klia tru long pasin bilong pret long BIKPELA,  
na bai yu lukim trupela save bilong God.**

Long hatwok bai yumi ken i save long God. Sapos yumi prea strong i go i go bilong kisim save long tok bilong God, na yumi wok hat long painim na kisim save long ol tok bilong God i dip tumas, orait long dispela rot bai yumi klia tru long pasin bilong pret long BIKPELA, bai yumi klia tru long tok bilong God na bai yumi lukim trupela save long tok bilong God. BIKPELA i putim Em yet long ples klia long tok bilong God. Olsem na, ol wokman bilong autim tok bilong God ol i mas prea na hatwok na kisim save long God pastaim, na bihain ol i ken i autim long ol manmeri.

Planti ol yangpela man ol i laik kamap pasta na holim wok bilong autim tok bilong God, long wanem, ol i tingim olsem, dispela wok em i no hatpela wok. Tasol ol i rong olgeta. Sapos man bilong autim tok em i mekim wok stret, orait em bai mekim bikpela wok bilong redim tok pastaim na em i autim.

Na wokman i mekim olsem, orait em bai bisi tumas na em i no gat taim bilong mekim narapela wok bilong givim na tilim helpim long ol manmeri long ples.

## Prea na tok bilong God i groim sios.

*Ol brata na sista*, i gat wanpela rot tasol bilong groim sios na dispela rot i olsem, prea na tok bilong God. Taim sios i larim ol aposel i pas olgeta long prea na long autim tok bilong God, taim tok bilong God i ran i go, na *ol narapela man (lain 3)* i mekim wok bilong tilim helpim long ol manmeri i nidim helpim, orait sios bilong Jerusalem i gro. Namba bilong ol manmeri i bilipim na trastim God long kisim bek ol long feiftul wok bilong Jisas, namba bilong ol i kamap bikpela (**lain 7**).

Ating sampela taim yumi tingim olsem, ol manmeri ol i no inap senis na kam na bilipim na trastim na bihainim Jisas. Tasol yumi no ken i givap. Long wanem, sapos yumi larim prea na tok bilong God i stap nambawan samting, sapos yumi larim tok bilong God bilong feiftul wok bilong Jisas i ran i go, orait ol kainkain manmeri ol i ken i harim, na God i tanim bel bilong ol na kisim ol i kam.

Glenn.

Sapos yu laik save moa long dispela tok, orait yu lukim Aposel 6:1-7 long *Autim Tok* long [www.pngbiblesources.org](http://www.pngbiblesources.org).